

Selibasia

Resientemente un suseso ku a tuma lugá na Morrope, un pueblo kampesino chikitu na Peru, a lamta basta komentario na nos islanan. Pastor Jorge Arbañil Rico a wòrdu ekspulsá for di Iglesia Katólíko pasobra a sali na kla ku e tabata kasá i tabatin dos yu. Pastor Aribañil a duna di konosé ku na Peru tin shen mas pastor ku ta kasá i tin yu. E parokianonan di Morrope, kuestionando selibasia pastoral, a defendé Arbañil i a stroba otro pastor di tuma su lugá.

Un persona selibato ta un persona ku no ta kasa i ta biba moral pa motibunan religioso. Na nos islanan nos ta rekonosé selibasia komo un rekisito di Iglesia Katólíko Romano pa nan klero. Ma selibasia ta praktiká pa vários religion. Por ehèmpel, Iglesia Ortodòks di Ost ta para riba ku nan obisponan mester ta selibato. Sinembargu nan pastornan por kasa promé ku ordenashon ta tuma lugá.

Nos tur por tin nos opinion. **Ma e pregunta prinsipal den e diskushon aki**—méskos ku kualke diskushon—**no ta loke un iglesia ta bisa, ma ta kiko Dios ta bisa?** Pa deskubrí esaki, nos tin ku habri e páginanan di Skritura santu.

Ta klaro ku Palabra di Dios ta kontené ehèmpelnan di hende selibato: Jeremias, Juan Boutista, kisas apòstel Pablo, i sigur nos no por lubidá Hesus. Ma ta obvio ku **e plan usual di Dios ta matrimonio**. Despues ku Dios a krea Adam, El a bisa: “*No ta bon pa e hòmber ta so; lo Mi traha un yudadó p’è ku ta pas kuné*” (Génesis 2:18). Desde kreashon, e gran mayoria parti di hende ta deseá i ta buska un partner di e sekso opuesto.

Ma esei no ta e kaso ku tur hende. Algun persona tin e abilidad pa keda selibato. Apòstel Pablo ta duna di konosé ku selibasia ta un regalo di Dios ku algun hende so ta haña. Papiando di matrimonio i selibasia el a afirmá, “...*kada hende tin su mes don di Dios, un na e manera aki, i otro na e manera aya*” (1 Korintionan 7:7). Hesus tambe a deklará, “...*tin eunuko ku ta hasi nan mes eunuko pa kousa di e reino di shelu*” (Mateo 19:12). Pues, si un persona tin e abilidad pa keda selibato, e ta liber pa hasi esei **boluntariamente**.

Selibasia nunca ta un obligashon den Beibel. Maske apòstel Pablo a mira e benefisionan di selibasia, (pusibelmente e mes tabata soltero) el a skirbi, “*Ma si bo kasa, bo no a peka; i si un birgen kasa, e no a peka...*” (1 Korintionan 7:28). Ta un echu ku no tur parokiano i pastor tin abilidad pa keda selibato. Su instrukshon ta kla: “...*si nan no tin dominio propio, laga nan kasa; pasobra ta mihó kasa ku kima di pashon*” (1 Korintionan 7:9). E mésun apòstel tabata mashá kategórikiko ora el a skirbi ku siñansa ku ta prohibí matrimonio ta un doktrina falsu (1 Timoteo 4:1-3).

I kiko di pastornan? Ta parse ku e plan normal di Dios ta pa pastornan kasa. Henter e sistema di saserdosia den Tèstamènt Bieu tabata Dios Su idea. E saserdotenan klaramente no tabata selibato; nan tabata esposonan i tatanan. Den Tèstamènt Nobo, Dios a duna un lista di kalifikashon pa personanan ku mester ta lídernan di iglesia. Entre otro nan mester ta “...*esposo di ún esposa, ku tin yu...*” (Tito 1:6; 1 Timoteo 3:2,4-5). Nos sa ku Pedro, un apòstel prominente, tabata kasá (Mateo 8:14). Pues, **e patronchi normal pa pastornan ta ku nan ta kasá i tin un bida familiar ehemplar**.

Segun Beibel, selibasia ta un regalo di Dios ku un persona boluntariamente por usa si e tin e don ei. Ma nunca Palabra di Dios ta siña ku siertu persona ta obligá pa praktiká selibasia ...ni parokiano, ni pastor.